

**1258-1258- OFP - Acta Capitulum Generalium Tholose Celebrati**

In nomine patris et filii et spiritus sancti. Amen.

Acta capituli generalis Tholose celebrati  
anno Domini · M° · CC° · LVIII° ·

**Confirmamus** has constitutiones. In capitulo de suffragiis mortuorum. ubi dicitur. in unaquaque provincia. deleatur totum. usque ad anniversarium fratrum. et dicatur sic. quilibet fratrum celebret · xxx · missas in anno pro fratribus ordinis defunctis. et quilibet clericus · xxx · vicibus · vii · psalmos et quilibet conversus · xxx · vicibus · c · pater noster. Et hec habet · iii · capitula.

Item hanc. In eodem capitulo. ubi dicitur. et quilibet conventus unam in communi. dicatur sic. quilibet conventus · xx · missas in communi. Et hec habet · iii · capitula.

Item hanc. In capitulo de electione prioris provincialis. ubi dicitur. poterit autem ipsum nichilominus magister ordinis confirmare vel amovere. addatur. quod si ordo magistrum non habuerit; tres de ipsis electoribus aliis ab electo. qui primitus habitum nostri ordinis susceperunt. ipsum confirmandi et compellendi ad officium habeant potestatem. quod si non concordaverint; duorum sententia prevalebit. si vero electum non confirmaverint; ab eisdem electoribus ad electionem iterum procedatur. et ad tres antiquiores secundum predictam formam confirmatio pertinebit. Et hec habet · iii · capitula.

Item. In capitulo de ieiuniis. in fine dicatur sic. in parasceve per totum diem in pane et aqua abstinemus. et de ordinario removeatur prout ibi dicitur. Et hec habet · iii · capitula.

Approbamus has. In capitulo de electione prioris conventualis. ubi dicitur. fratres post annum a professione sua. deleatur. post annum. et dicatur. post duos annos. Et hec habet · ii · capitula.

Item hanc. In eodem capitulo. ubi dicitur. quod si infra mensem non elegerint. addatur. vel postulaverint. Et hec habet · ii · capitula.

Item hanc. In capitulo de capitulo provinciali. ubi dicitur. cum singulis sociis. a pluribus de capitulo suo. etiam citra medietatem eligendum electis. deleatur. citra medietatem. et addatur. ultra medietatem etc. Et hec habet · ii · capitula.

Item hanc. In eodem capitulo. ubi dicitur. infra vero idem tempus. alii non admittantur in conventibus. ad discussionem eorum que ad generale vel provinciale capitulum sunt mittenda. addatur. nec ad electionem socii prioris conventualis. nec etiam ad electionem electorum prioris provincialis. Et hec habet · ii · capitula.

Item hanc. In capitulo de studentibus. ubi dicitur. mittere ad studendum. ad loca. in quibus viget studium. addatur. secundum consilium et ordinationem diffinitorum capituli provincialis. quibus etiam de eorum consilio providebit. Et hec habet · ii · capitula.

**Inchoamus** has. In capitulo de electione diffinitorum capituli generalis et provincialis. ubi dicitur. aliquis de magis ydoneis eligatur a capitulo. deleatur. a capitulo eligatur. et totum quod sequitur. usque. cui socius. etc. et dicatur sic. aliquis de magis ydoneis a maiori parte capituli provincialis eligatur. qui sit generalis capituli diffinitor.

Item hanc. In capitulo de ieiuniis. ubi dicitur. ab ecclesia institutis. addatur. et sextis feriis.

Item hanc. Ubi dicitur. quod fratres discalciati vadant. et intrent capitulum. deleatur. discalciati.

Item hanc. In capitulo de officio ecclesie. ubi dicitur. surgant fratres dicendo matutinas. deleatur hoc. et dicatur sic. postquam surrexerint fratres dicant matutinas.

Item hanc. In capitulo de inclinacionibus. ubi dicitur. et quando nomen beate virginis nominatur ad antiphonam. salve. deleatur hoc. et infra in eodem capitulo. ubi dicitur. veni sancte spiritus. addatur. et ad antiphonam salve. quando nomen beate virginis nominatur.

Item hanc. In capitulo de predicatoribus. quod dicitur. ad exercitium autem. etc. deleatur totum. usque nullus autem. etc.

Item hanc. In capitulo de studentibus. ubi dicitur. nullus autem fiat publicus doctor. deleatur quod sequitur. nisi ad minus theologiam audierit per · iiiior · annos. et dicatur sic. nullus fiat publicus doctor vel disputet etc.

Item hanc. In capitulo de inclinacionibus. ubi dicitur. quippiam vestimenti tribuitur. profunde inclinantes. deleatur. profunde.

Item hanc. In capitulo de electione prioris provincialis. post illud. includi sicut in electione magistri non oportet. addatur sic. si vero congregato provinciali capitulo. casu aliquo contingente. provincia. priore provinciali caruerit. ad ipsum provinciale capitulum secundum predictum modum eligendi; predicta electio pertinebit.

Item hanc. In eodem capitulo. ubi dicitur. de quolibet conventu ad hoc idem electos. addatur. a maiori parte conventus. omnibus fratribus etc.

Item hanc. In capitulo de cibo. ubi dicitur. requirat a cellarario. deleatur. cellarario vel ministro. et ponatur. servitore.

Item hanc. In capitulo de capitulo generali. in fine dicatur sic. capitulum autem generale. uno anno. et capitula provincialia sequenti anno. et tercio iterum generale. et sequenti provincialia. et sic deinceps. alternatim per annos succedentes generalia et provincialia capitula celebrentur. Et quidquid contra sententiam huius constitutionis repertum fuerit in constitutionibus. per diffinitores sequentis tercii capituli removeatur.

Item hanc. In capitulo de conversis. ubi dicitur. scapularia longa et lata. addatur. usque ad iuncturam inter pugnum et brachium etc.

Item hanc. In eodem capitulo. ubi dicitur. possunt et brevia. grisei coloris habere scapularia. deleatur. grisei. et dicatur. eiusdem coloris.

**Admonemus** fratres qui amodo facient scribi biblias vel aliqua scripta. quod faciant scribi de litera bene legibili. ut magis cedant in communem fratrum utilitatem.

Item. Caveant fratres. in sermonibus a nimietate ricinorum exquisitorum.

Item. Signum quod fit post completorium et post comestionem tempore dormicionis. non fiat cum maiori campana. sed cum alia que competenter possit audiri per domum.

Item. Interdicimus districte. ne fratres aliqui directe vel indirecte procurent. quod alique persone seculares. se intromittant de limitacione terminorum inter provincias. vel conventus ordinis nostri.

Item. Fratribus studentibus in · iiiior · studiis sollempnibus · iiiior · provinciarum. concedimus ut libertate utantur. qua et studentes qui sunt ad studium Pa-risius deputati.

Item. Fratres non emant sibi pannum pro vestibus. sed per manum vestiarii omnibus ematur. sive dentur vestes de communi provisione; sive alias dentur denarii. pro vestibus specialiter alicui. eciam de licencia.

Item. Apponant fratres curam. quod libri de officio qui de novo scribuntur. corrigantur diligenter ad exemplaria prima.

Item. Nullus accuset de re criminosa quam audivit. nisi velit et possit probare. quod non solum audiverit; sed quod eciam ita sit.

Item. Fratres possunt amodo cessare. a · vii · psalmis et letania dicendis in epdomada<sup>1</sup>.

Item. Voluntati fratrum relinquimus. quod in capitulo provinciali possint committere priori provinciali. et diffinitoribus capituli provincialis; electionem visitorum.

Item. In prostracionibus extra chorum faciendis; relinquimus fratres consuetudini antique.

Item. Iniungimus districte prioribus et fratribus. quod non faciant edificia nisi humilia et mediocria. et secundum formam constitutionis. Et volumus quod visitatores anni presentis ubi invenerint aliquos in contrarium excessisse; significant futuro capitulo generali.

Item. In capitulis generalibus et provincialibus. non dentur ad plus; nisi duo pulmenta preter pulmentum et fructus.

Item. Iniungimus prioribus provincialibus et diffinitoribus · iiiior · provinciarum. in quibus sunt studia sollempnia. quod ordinat. quod semper sit unus frater qui legat extraordinarie de sentenciis vel de textu. in illis conventibus illius provincie. ubi est sollempne studium illius provincie.

Item. Sciant omnes fratres quod quando constitucio de sedendo in terra pro fractione silicii fuit confirmata; magister ordinis. et diffinitores publice et coram toto capitulo declaraverunt. quod non intelligebant. quod fratres per illam constitutionem tenerentur ad comedendum panem et aquam. sed solum ad sedendum in terra. et hoc constitit nobis per ipsum magistrum. et per aliquos alios qui tunc diffinitores fuerunt.

Item. Omnibus prioribus vel eorum vicariis. qui secundum monicionem preteriti capituli. non preciderunt capucia conversorum. iniungimus quod legant · l · psalmos et constitutiones a principio usque ad finem. diligenter.

Item. Omnibus prioribus provincialibus qui non miserunt acta capituli provincialis ad capitulum generale magistro ordinis; iniungimus · l · psalmos. et · iii · disciplinas.

Item. Concedimus · i · domum in regno Navarre ad petitionem regis. si videatur priori provinciali et diffinitoribus capituli provincialis Hyspanie.

Item. Ad preces domini Phylippi de Monteforti; concedimus · i · domum apud Castras. dyocesis Albiensis. si visum fuerit fratri Guillelmo Raymundi. et priori montis Albani. et fratri Aymerico de Leone.

**Hec suntsuffragia.**

Pro domino papa etc.

**Absoluciones** priorum committimus diffinitoribus capituli provincialis.

Capitulum generale sequens in provincia Francie in conventu Valencenensi.

**Moniciones** magistri.

---

<sup>1</sup> Rationem cur "fratres amodo cessare possint a sep-tem psalmis et letania dicendis in epdomada" Humbertus ipse exponit in suis litteris post capitulum fratrimissis; cf. app. n.X.

Ne acolyti nuda manu tangant calicem.

Item. Quod fratres non habeant scapularia vel capas duplices.

Item. Quod de libris decedencium provideant priores fratribus ydoneis. et convertant omnia in communes usus.

Item. Quod fratres non faciant preces importunas apud inquisitores.

Item. Quod apud Prulianum non mittantur amodo fratres de facili in carcerem.

Item. Quod fratres inquisitores et alii qui gerunt negocia regis pro restitutionibus. non equitent nisi propter timorem. vel quando habent facere vias laboriosas.

Item. Quod vacaciones non fiant. ubi est studium sollempne. ante festum sancti Iohannis Baptiste.

Item. Quod ordinacio de providendo studentibus preteriti capituli mutetur. et aliter provideatur.

Actis additae sunt litterae magistri ordinis; cf. app. n.X.